

## Muotēnas rauda

Dokruželi muna – dungaus ruozateli,  
Deivalis, ka leistu tau nimei sugrīžtei.  
Munei aplunkītum, šērdeli nazužtu.  
Nerand ana veitas, apušele krūpčiuo.  
Metu marias āja, ašarūs paskendus,  
Veržas aplunkītei, kaubureli rand tēk.

Kuokiūs tu pasviečiūs, geguželi muna?  
Tāp gļauštei nuorietūs. Gedulu apsiuva  
Smertis dalia mammas, sonku baktietei,  
Kada žēiburelē ēm vašku kapsietei.  
Vuoš i vuoš pušeli, doužt kap tas stēklas,  
Nier kam pasiguostei. Gal buvau natēkus,  
Tau aš muotēnelē, dabuot namuokiejau,  
Ka Deivalis atiemī, katran tāp mīliejau?  
Veituo katruos gulus būč ē doubi gēli.

Dokruželi brongi, rīte – vakarelie  
Malda bīr švenčiausiam dungaus Deivuleliū.  
Sparnus ēdouk anai, atskrēs nuons ē sapna.  
Pagailiek, atiemes, lēkes šērdei akla.  
Kor bainu, vaidenas anuos abruozdelis.  
Pusei muneis – žemie, pusei – pavēršēlēs.  
Kuodie, Deivuleliau, najeimē tu muneis?  
Lēka siratelē, Ēlgiu sklendē dūmās?  
Lapkreitis, kap medi šakeles nudraska,  
Tāp munei šērdeli riden skausma vaška.

Reipuju, roukujū, kap raiba gegeli  
Ba veina sparneli, tuščia lēnkst runkeli.  
Nukarus anuoji, speiga raudū gēlda.  
Pagailiek, Deivali, kalk sēdabra tēlta,  
Leisk anai sugrīžtei sekundeli menka,  
Jok žēnā perkūns kāp daluželi tranka.  
Anai prēsēgļaudus, speigā šalēn trauktūs.  
Pagailiek tu muneis, ēlgs čieselis laukts juk.  
Išeinu i nakti, galveli vožvertus,  
Veizu, katra žvaigžde ana akes merkus.  
Kalbēnu: dukreli, a nešalta? Nabaisu?  
Voždegu leipsneli meiles anai skaisti.

Dokruželi muna – dungaus zakrasteli,  
Palēkta i šiandei kertie tau šērdelie.  
Katran pēršta pjautu muotēnas, tas – uopa.  
Teik daug i skrīneli metū ašaruotū  
sušuokēn, ka sonku bapaneštei, sonku.  
Nagīj gēli žaizda, dažuos krauja sonka.  
Angeleli sava sapnūs tabašēldau,  
Galveli ēšgluostau, meiles kalu tēlta.  
Liktuoreli degus meldūs Deivuleliū:  
Veins žēnā, kāp aižuos natektie mēnteli.  
Mīliek, nadouk muna maželes skaustei,  
Kuol munei pašauksi bučinelēs praustei.